

Nehemías

Nehemías motatajti por israelitame

¹ Ya ni nopa camanali cati na, niNehemías, niicone Hacalías, niquipijcuilohua.

Ipan metzti Quisleu ipan toisraelita calendario*, quema Tanahuatijquet Artajerjes yahuiyaya para 20 xihuit tanahuatis ipan tali Persia, na niNehemías niitztoya ipan nopa hueyi altepet Susa ipan icaltanahuatil pampa nijtequipanohuayaya nopa tanahuatijquet.

² Huan techpaxaloco se noisraelita icni cati itoca Hanani, huan ihuaya hualajque sequinoc israelita tacame ten tali Judá. Huan niquintatzintoquila quenicatza eltoya ica nopa israelitame cati achtohui quinhuicaque ilpitoque hasta nopona Babilonia, huan teipa sempa quincahuilijque ma tacuepilica ipan altepet Jerusalén. ³ Huan inijuanti technanquilijque: “Se hueyi pinahualisti quej itztoque nopa israelitame cati sempa mocuectoque Jerusalén. Nelía taijyohuáj miyac. Sosolijtoc altepet Jerusalén, huan nopa tepamit huetztoc huan icaltehua nochitata toc.”

⁴ Huan quema na nijcrajqui nochit ya ni, nimosehui huan nichocac. Para miyac tonali nimocueso, huan nimosajqui, huan nimotatajti ica Toteco Dios cati itztoc ipan ilhuicac. ⁵ Huan niquilhui:

* **1:1** 1:1 Elqui ipan se metzti diciembre ipan tocalendario ten amá.

“TOTECO, ta tiDios cati tiitztoc ilhuicac, nimitztajtanía chicahuac techtacaquili. Ta tahuel tihueyi hasta titemajmati. Ta tijchihua nochicati tijtencahua tiquinchihuilis mocone-hua. Tahuel tiquinicnelía nochicati quichihuaj motanahuatil. ⁶ Pero techtacaquili na, nimotequipanojca, cati tayohua huan tonaya nimitztajtanía por tiisraelitame cati timotequipanojcahua. Nimoixmati para na huan nochicati titajtacolchijtoque moixpa. ⁷ Tahuel timotzontochonchijtoque ica ta, huan amo tijneltocatoque motanahuatilhua, yon moleyes, yon sequinoc tamachtili cati techmacac huejcajquiya ica motequipanojca Moisés.

⁸ “Xiquelnamiqui cati ta tiquilhui Moisés. Tiquijto sintatia titajtacolchihuasquíaj, huajca techsemanasquía huan techcahuasquía campa hueli ipan nochicati taltipacti. ⁹ Pero sintatimoyolcuepasquíaj sempa huan tijneltocasquíaj motanahuatilhua, huajca masque timopantisquía huejca, techhualicasquía huan techsejcotilisquía sempa ipan Jerusalén, nopa altepet cati ta tijtapejpenijtoc para elis moaxca.

¹⁰ “Tojuanti timotequipanojcahua cati techmanahuijtoc huan techchijtoc timoaxcahua ica mohueyi chicahuialis. ¹¹ Huan nimitztajtanía TOTECO para xijtacaquili cati nimitztajtanía huan xiquintacaquili mocone-hua

cati mitzhueyichihuaj ica paquilisti.
 Techpalehui para nopa tanahuatijquet
 ma quiita para cuali cati niquijtohua huan
 ma techtasojta quema niyas niquilhuiti ni
 tamanti.

“Quej nopa na niNehemías niquilhui TOTECO. Na
 cati nijtequipanohuayaya nopa tanahuati-
 jquet. Nijpixqui nopa tequit para nijyecos
 nochí itailis quema ayemo quiyyaya para
 nijmatis sinta se quitalilijtoya se pajti para
 quimictis.”

2

*Artajerjes quicahuili Nehemías ma yahui
 Jerusalén*

¹ Teipa quema ya panotoya nahui metzti huan
 eliyaya ipan metzti Nisán ipan toisraelita cal-
 endario*, na nijhuiquili ixocomeca iayo nopa
 tanahuatijquet huan nimantzi yaya techitac para
 nimocuesohua pampa amo quema techitztoya
 quej nopa. ² Huajca techtatzintoquili:

—¿Para ten timocuesohua? Amo nesi sinta tim-
 ococohua. Techilhui taya cuesoli tijpiya.

Huajca masque tahuel nimajmahuiyaya,
³ nijnanquili:

—Tanahuatijquet, xiitzto para nochipa. ¿Para
 ten amo nimocuesos quema quitahuelcajtoque
 nopa altepet Jerusalén campa motalpachojque no-
 huejapan tatahua? Nochí sosolijtoc huan icalte-
 hua tatatoc.

⁴ Huan nopa tanahuatijquet techtatzintoquili:

* **2:1** 2:1 Elqui se tonali ipan abril o mayo ipan tocalendario ten
 ama.

—¿Taya tijnequi ma nijchihua?

Huajca na nimotatajti ica Toteco Dios para ma techpalehui,⁵ huan niquilhui:

—Sinta tiquita para cuali huan sinta hueyi moyolo ica na, huajca techtitani ipan tali Judá campa motalpachojque notatahua para huelis ni-jcualchijchihuati nopa altepet.

⁶ Huan nopa sihua tanahuatijquet mosehuij-toya ihuaya nopa tanahuatijquet quema nica-manaltic. Huan nopa tanahuatijquet techilhui:

—Huan ¿quesqui tonali monequis timocahuas?
¿Quema timocuepasquía?

Huajca na niquilhui quema niyas huan niquix-quetzqui se tonali quema nimocuepasquía. Huan yaya quipacti huan techtitánqui.⁷ Huan nojquiya niquilhui: “Sinta mitzpactía, techmaca amatajcuiloli para nopa gobernadores ipan seyoc nali hueyat Eufrates para nechcahuase niquixcotonas ipan inintal para huelis niajsiti ipan tali Judá.

⁸ Huan nojquiya techmaca seyoc amatajcuiloli para Asaf cati quinmocuitahuía nochí cuamili cati moaxca para ma techmaca cuahuit cati mon-equi para taquetzalme, huan para caltemit ten nopa cali cati nelchicahuac inacasta nopa hueyi israelita tiopamit. Huan nojquiya ma techmaca cuahuit para caltemit ipan itepa nopa altepet huan para se cali para na.” Quej nopa niquilhui. Huan nochí ya nopa techmacac nopa tanahuatijquet pampa na nimotemachijtoya ipan Toteco Dios.

⁹ Huan teipa quema niajsito iniixpa nopa tanahuatiani ten seyoc nali hueyat Eufrates, niquinmactili nopa amatajcuiloli

cati techmacatoya Tanahuatijquet Artajerjes. Huan itztoyaj nohuaya miyaqui tayacanani ten soldados cati nopa tanahuatijquet quintitantoya para ma techmocuitahuica. Sequij yahuiyaya j cahuayo j tipa huan sequij san icxinejnemiyaya j.
10 Pero quema quimatque noch i ya ni, Sanbalat ten Horón huan Tobías ten Amón, tahuel cualanque pampa ajsitoya se cati motemacatoya para quinpalehuis israelitame.

Nehemías ajsic ipan altepet Jerusalén

11 Huan niajsic ipan altepet Jerusalén huan quema ya niitztoya eyi tonati nopona, **12** niquisqui ica tayohua huan niquinhuicac se quesqui tacame nohuaya. Huan amo aqui niquilhui cati Toteco Dios quitalijtoya ipan noyolo para nijchihuasquía ipan altepet Jerusalén. Huan niyahuiyaya ipan se burro huan nopa tacame techtoquiliyaya ini-icxipa. **13** Huan ipan nopa yohuali tiquisque ipan nopa altepet campa itoca nopa Tamayamit Caltemit, huan tiyajque campa nopa ameli cati itoca Dragón huan sempa tiyajque campa seyoc caltemit cati itoca Tasoli Caltemit. Huan niquitac noch i nopa tepamit cati huetztoya huan noch i nopa caltemit cati tatatoya. **14** Huan teipa tiyajque campa nopa caltemit cati itoca Ameli Caltemit, huan teipa tiajsitoj ipan nopa ameli ten nopa tanahuatijquet. Huan nopona amo huelqui panoc noburro pampa tahuel tafiero. **15** Teipa nopa tayohua ninejnentiyajqui hasta campa nopa huactoc atajti huan quej nopa niyahualo noch i nopa altepet. Huan niquitac noch i quenicatza eltoya huan

nimocuetqui sempa campa nopa caltemit campa niquistejqui.

¹⁶ Huan nopa tequichihuani amo quimatque canque niyajtoya huan taya nijchihuayaya pampa ayemo teno niquinilhuijtoya ten cati nimoilhuijtoya para nijchihuasquía. Amo teno niquinilhuijtoya noisraelita icnihua, yon nopa totajtzitzí, yon tequichihuani, yon tayacanani, yon nopa sequinoc tacame cati teipa quichihuasquíaj nopa tequit.

Nehemías quinyolchicajqui masehualme para tequitise

¹⁷ Pero teipa niquinnotzqui nochí nopa israelitame huan niquinilhui:

—Amojuanti cuali anquimatij para tahuel tafiero quej tiitztoque nica ipan ni altepet pampa nochí tamisosolijtoc. Huetztoc nochí tepamit huan icaltehua tatatoque. Huajca ama ma tijpehualtica titequitise huan tijcualchijchihuase nochí para ayecmo aquí hueli techpinajtis.

¹⁸ Huan teipa niquinilhui quenicatza Toteco Dios techpalehuijtoya pampa hueyi iyolo. Niquinilhui nochí cati techilhuijtoya nopa tanahuatijquet huan quenicatza nechcajqui ma nihuala hasta Jerusalén para nijchihuas nopa tequit cati nimoilhuijtoya para nijchihuas. Huajca nochí inijuanti tananquilijque:

—Cualtitoc, ma titequitica.

Huan nochí pejque tequitij ica miyac paquilsti.

¹⁹ Pero quema quimatque Sanbalat ten altepet Horón, huan Tobías cati elqui se amonita tacat,

huan Gesem nopa árabe tacat, injuanti techpina-jtijque huan techcualancaitaque. Techilhuijque:

—¿Taya anquichihuaj amojuanti? San anmosentanchihuaj ica nopa tanahuatijquet huan anquiixpanoj.

20 Huan na niquinnanquili:

—Ica itapalehuil Toteco Dios cati quichijqui il-huicacti, tojuanti, tiitequipanojcahua, tijcualchi-jchihuase ni altepet. Pero amojuanti amo teno anquipiyaj ica tojuanti huan amo huelis anmo-calaquise ipan ni tamanti.

3

Inintoca cati quicualchijchijque tepamit

1 Huajca nopa totajtzi Eliasib huan iicnihua cati eliyayaj totajtzitzi pejque quicualchijchihuaj nopa tepamit campa itoca nopa Borrego Caltemit. Quiiyocatalijque nopa caltemit para Toteco huan quiquetzque. Huan nojquia quicualchijchijque nopa tepamit hasta nopa huejcapantic tetzocti cati itoca Torre Hananeel cati elqui para se tamocuitahuijquet. **2** Ten nopona, quicualchijchijque nopa tepamit nopa tacame ten altepet Jericó. Huan ininacasta quicualchijchijqui Zacur, icone Imri.

3 Huan iconehua Senaa quiquetzque itaquetzalhua nopa Michi Caltemit, huan quitalijque nopa caltemit ica nochí nopa huejhueyi lavos huan nopa teposbarra cati monequi para motzacuas cuali. **4** Huan ininacasta quicualchijchijqui tepamit Meremot, icone Urías huan iixhui Cos. Huan inacasta quicualchijchijqui Mesulam, icone Berequías

huan iixhui Mesezabeel. Huan iquespa quicualchijchijqui nopa tepamit Sadoc, icone Baana. ⁵ Huan inacasta tequitique nopa tacame cati ehuani altepet Tecoa, pero cati tayacanani ipan Tecoa amo quinejque quinpalehuise. ⁶ Huan Joiada, icone Paseah, huan Mesulam, icone Besodías, quicualchijchijque nopa Caltemit Sosoltic. Quiquejquetzque itaquetzalhua huan quitalijque nopa caltemit ica nochí nopa huejhueyi lavos huan teposbarris. ⁷ Huan campa tanqui inintequi ipan tepamit, quicualchijchijqui Melatías cati ehua altepet Gabaón, huan Jadón ten altepet Meronot, inihuaya nopa tacame cati ehuani ipan altepet Gabaón huan Mizpa. Nopa altepeme mocajqui ipan itanahuatilis nopa tanahuatijquet ipan ne se nali hueyat Eufrates. ⁸ Huan ininacasta quicualchijchijqui nopa tepamit Uziel, icone Harhaía, nopa oro teposchijquet. Huan inacasta quicualchijchijqui tepamit Hananías cati quimatiyaya quichijchihua nochí tamanti taajhuiyacayot. Huan quej nopa quicualchijchijtyajque itepa altepet Jerusalén hasta campa itoca nopa Tepamit Patahuac. ⁹ Ininacasta quicualchijchijqui Refaías, icone Hur. Refaías elqui gobernador ipan tajco altepet Jerusalén. ¹⁰ Huan inacasta tequitic Jedaías, icone Harumaf cati tequitiyaya iixmelac ichaj. Huan inacasta quicualchijchijqui tepamit Hatús, icone Hasabnías.

¹¹ Huan inacasta quicualchijchijqui Malquías, icone Harim, huan Hasub, icone Pahat Moab. Quicualchijchijque campa nopa huejcapantic tetzocti cati itoca Torre Horne campa mocahuas se

tamocuitahuijquet para tachiyas. ¹² Huan inacasta quicualchijchijque Salum, icone Halohes, inihuaya iichpocahua. Salum eliyaya gobernador ipan ne seyoc tajco altepet Jerusalén.

¹³ Huan Hanún huan nopa masehualme cati ehuani ipan altepet Zanoa quicualchijchijque nopa Tamayamit Caltemit. Quiquejquetzque itaquetzalhua huan quitalijque nopa caltemit ica nopa huejhueyi lavos huan nopa teposbarras. Nojquiya quicualchijchijque 450 metros ten tepamit huan tamitoj nechca campa nopa Tasoli Caltemit. ¹⁴ Huan nopa Tasoli Caltemit quicualchijchijqui Malquías, icone Recab. Malquías elqui gobernador ipan nopa municipio cati itoca Bet Haquerem. Quinquetzqui taquetzalme huan quitali nopa caltemit ica nopa huejhueyi lavos huan nopa teposbarra.

¹⁵ Huan Salum, icone Colhoze, cati elqui gobernador ipan nopa municipio Mizpa quicualchijchijqui nopa Ameli Caltemit. Cuali quisencajqui ica taquetzalme huan quitontzajqui. Teipa quitali icaltehua ica huejhueyi lavos huan nopa tepos barra. Huan yaya nojquiya quicualchijchijqui nopa tepamit hasta nopa Ameli Siloé huan tamito campa huecjajquiya eltoya ixochimil Tanahuatijquet David huan hasta campa temo nopa escalones ten Ialtepe David. ¹⁶ Teipa campa yaya tanqui itequi, quicualchijchijqui Nehemías, icone Azbuc, cati eliyaya gobernador ipan tajco nopa municipio Bet Sur. Huan yaya quicualchijchijqui hasta iixmelac campa motalpacho David, huan hasta campa eltoya nopa ameli. Huan

tamito itequi hasta campa achtohuiya eltoya ininchaj Nopa Soldados Cati Más Motemacaj.

¹⁷ Huan inacasta quicualchijchijque nopa tepamit nopa levitame cati tequitiyayaj imaco Rehum, icone Bani. Huan ininacasta, Hasabías nopa gobernador ipan tajco nopa municipio Keila tequitic para imunicipio. ¹⁸ Huan inacasta, quicualchijchijque nopa tepamit ihuampoyohua cati tequitiyayaj imaco Bavai, icone Henadad, cati elqui gobernador ipan ne seyoc tajco nopa municipio Keila. ¹⁹ Huan ininacasta quicualchijchijqui nopa tepamit Ezer, icone Jesúa, cati elqui gobernador ipan tajco nopa municipio Mizpa. Yaya tequitic iixmelac nopa taixtemolis campa nopa cali campa quiajoctoyaj nochí teposti para ica tatehuise nopona campa moixnamiquiyaya nopa tepamit. ²⁰ Huan inacasta Baruc, icone Zabai, pejqui quicualchijchihua seyoc achi ipan nopa tepamit ten campa moixnamijqui hasta icalte ichaj Eliasib, nopa hueyi totajtzi. ²¹ Huan inacasta, tequitic Meremot, icone Uriás huan iixhui Cos. Yaya quicualchijchijqui nopa tepamit ten icalte totajtzi Eliasib hasta campa itamiya ichaj.

²² Huan inacasta quicualchijchijque nopa tepamit nopa totajtzitzi cati ehuayayaj ipan nopa tamayamat nechca hueyat Jordán. ²³ Huan ininacasta tequitic Benjamín huan Hasub. Inijuanti quicualchijchijque nopa tepamit cati mocahuayaya inincalixpa. Huan ininacasta tequitic Azarías, icone Maazías huan iixhui Ananías. Yaya quicualchijchijqui cati nechca ichaj. ²⁴ Huan ininacasta tequitic Binúi, icone

Henadad. Yaya quicualchijchijqui nopa tepamit ten ichaj Azarías hasta campa monamijqui nopa tepamit ipan esquina. ²⁵ Huan Palal, icone Uzai, quicualchijchijqui nopa tepamit iixmelac nopa esquina huan ipan nopa huejcapantic tetzocati para se tamocuitahuijquet. Nopa tetzocati quisa ipan ichaj nopa tanahuatijquet huan mocahua inacasta icalixpa nopa tatzacti. Huan inacasta tequitic Pedaías, icone Faros. ²⁶ Huan inacasta, quicualchijchijque nopa tepamit nopa tiopa tequipanohuani cati ehuayayaj ipan nopa tepet Ofel. Inijuanti quisencajque nopa tepamit hasta nopa At Caltemit cati mocajqui campa hualquisa tonati ten nopa huejcapantic tetzocati para se tamocuitahuijquet cati quisqui ipan tepamit. ²⁷ Huan ininacasta tequitique tacame ten altepet Tecoa. Inijuanti quicualtalijque seyoc quentzi nopa tepamit ten iixmelac nopa tetzocati cati huejcapantic hasta nopa tepamit campa nopa municipio Ofel.

²⁸ Huan ininacasta tequitique nopa totajtzitzti. Inijuanti quicualchijchijque nopa tepamit cati elqui ica huejcapa ten nopa Cahuayo Caltemit huan sesen tequitic iixmelac ichaj. ²⁹ Huan ininacasta tequitic Sadoc, icone Imer. Yaya quicualchijchijqui iixmelac ichaj. Huan inacasta tequitic Semaías, icone Secanías, cati nojquiya quimocuitahui nopa Caltemit Campa Hualquisa Tonati. ³⁰ Huan ininacasta tequitique Hananías, icone Selemías, huan Hanún, ichicuasempa cone Salaf. Huan nechca ya tequitic Mesulam, icone Berequías. Yaya quicualchijchijqui nopa

tepamit iixmelac ichaj. ³¹ Huan inacasta tequitic nopa oro teposchijquet Malquías. Yaya quicualchijchijqui nopa tepamit hasta nopa cali campa mocahuayayaj tanamacani huan cati tequipanojque tiopan calijtic. Malquías tequitic iixmelac nopa Caltemit Campa Tetajtolxitahuaj huan hasta nopa cuarto cati huejcapa nechca campa moixnamiquiyaya nopa tepamit. ³² Huan nopa sequinoc tacame cati eliyayaj oro teposchihuani huan tanamacani quicualchijchijque nopa tepamit ten nopa cuarto cati huejcapa hasta nopa Borrego Caltemit.

4

Inincualancaitacahua quinpinajtijke cati tequitiyayaj

¹ Huan quema quimatqui Sanbalat para tijcualchijchihuayayaj nopa tepamit cati quiyahualojtoya nopa altepet, tahuel cualanqui. Huan pejqui techpinajtía tiisraelitame. ² Huan miyacapa iniipa ihuampoyohua huan nopa tayacanca tacame ten tali Samaria, Sanbalat quijjo: “Pilteicneltzitzí ni israelitame. Huelismoilhuiáj para nimantzi tamise quicualchijchihuase inialtepe. ¿Huelismoilhuiáj sempa huelise quitatise tacajcahualisti nica? Xiquitaca quenicatza quiqxítiaj tet cati ya tatatoc huan sempa quitequihiúaj.”

³ Huan inechca itztoya Tobías nopa amonita tacat cati quijjo: “Xiquitaca quenicatza nelyamanic nopa tepamit cati quicualchijchihuaj. Sinta tejcos se cayochi ipani, quitamihuelonis.”

Nehemías motatajti

⁴ Huajca na nimotatajti huan niquijto: “Toteco Dios, xijcaqui quenicatza techpinajtíaj. Xijchihua para nochí catí inijuanti techilhuíaj ma elí para inijuanti. Ma huetzica inimaco inincualancaitacahua huan ma quinhuicaca ilpitoque para tetequipanose ipan sequinoc talme. ⁵ Amo xiquintapojpolhui inintajtacolhua huan amo xiquelcahua catí quichijtoque pampa quintzinquixtíaj ni tacame catí tequitij.”

Inincualancaitacahua quinmajmatijke

⁶ Huan tijsenhuiquiliçque tijcualchijchijçque nopa tepamit hasta eltoya tacualchijchihuáli hasta tajco ihuejcapanca catí quipixqui achtohuiya. Nopa masehualme tequitiyayaj ica miyac paquilisti. ⁷ Pero Sanbalat, Tobías huan nopa sequinoc árabe huan amonita tacame inihuaya nopa tacame ten altepet Asdod quimatque taya tijchihuayayaj. Quimatque para tijsenhuiquiliçtoyaj tijcualchijchihuaj nopa tepamit huan tijtemitiyayaj campa sosolijtoc, huan yeca tahuel cuanque. ⁸ Huan sentic quisencajque para ajsisse ipan altepet Jerusalén ica soldados para techtehuiquij huan quisosolose totequi. ⁹ Huajca tojuanti timotatajtiçque ica Toteco Dios, huan tiquintalijçque tamocuitahuiani para techmocuitahuise tayohua huan tonaya para timomanahuise ten inijuanti. ¹⁰ Teipa nopa israelitame ten tali Judá pejque quiijtohuaj para ya siyajtoque nochí catí tequitiyayaj ipan nopa tepamit huan noja polihuiyaya miyac

tequit. Huan quijtojque para amo tiyajatise para tijcualchijchihuase nochi nopa tepamit.

11 Huan tocualancaitacahua quijtohuayabaj para calaquisquíaj ipan toaltepe ixtacatzi quema amo tiquinchiyayaj huan techmictise. Quej nopa quijtojque, quitilquetzasquíaj totequi. **12** Huan nopa israelitame cati itztoyaj ininechca hualajque techilhuicoj miyac huelta para tocualancaitacahua hualayabaj ten campa hueli para techtehuiquij. **13** Huajca ni quintali masehualme ica inifamilias ma tamocuitahuica iica nopa tepamit campa más echcapantzi huan campa tacoyontoya. Huan quihuicayabaj inimacheta, inincuatamin cati huehueyac huan inincuahuitol para ica momanahuise. **14** Teipa quema ni quitac quenicatza nochi momajmatiyabaj, nimoquetzqui huan ni quinacamalhui nopa tayacanani, tequichihuani huan nochi nopa masehualme, huan ni quinilhui: “Amo xi quini macasica. Xiquelnamiquica para Toteco nelhueyi huan temajmati. Huajca xitatehuica por amoicnihua, huan amocone hua, huan amosihuajhua huan amochajchaj.” Quej nopa ni quinilhui.

15 Huan quema tocualancaitacahua quimatque para Toteco Dios technextilijtoya taya quichihuasnequiyabaj huan tijmachiliyabaj, ayecmo huelque calajque pampa tiquinchiyayabaj. Huajca ayecmo teno techchihuilijque huan nochi tojuanti timocuetque sempa ipan totequi. **16** Huan ten nopa tonal, san tajco tacame tequitiyabaj, huan tajco tamocuitahuiyabaj ica machetas, cutamatinti cati huejhuehueyac, cuahuitoli huan

cuataminti. Huan inijuanti moquentiyayaj intepos yolixtzajcahua. Huan nopa tayacanca soldados moquetzque iniica nopa israelitame ten tali Judá ¹⁷ cati quicualchijchihuayayaj nopa tepamit. Huan nopa tacame cati tamamayayaj tequitiyayaj ica se inimax huan ipan seyoc qui-huicayayaj inintepos. ¹⁸ Huan nochí cati tepanchihuani tequitiyayaj ica inimacheta motzinquechilpitoque. Huan yaya cati quimatqui quipizza tapitzali itztoya nonacasta. ¹⁹ Huan niquinilhui nopa tayacanani, tequichihuani huan nochí nopa sequinoc masehualme: “Tahuel hueyi ni tequit huan timoxelojtoque huan timopantíaj huejca campa titequitij, ²⁰ huajca campa anquicaquise nopa tapitzali, nopona xiyaca para ximosejcotilij nohuaya para tiquintehuitij tocualancaitacahua huan Toteco Dios tatehuis por tojuanti.”

²¹ Tipehuayayaj titequitij quema tanesiyyaya huan tijsenhuiquiliyayaj hasta quema ya tayohua huan quema monextiyayaj sitalime. Huan tajco ten tojuanti titamocuitahuiyayaj ica teposti. ²² Huan nojquiya niquinilhui nopa masehualme ten ehuani ipan sequinoc altepeme para inijuanti huan inintequivapanojaahua ma mocahuaca ipan altepet Jerusalén para cochise para nojquiya ma techpalehuica timopatatiyase titamocuitahuise ica tayohua huan quema tonaya titequitise. ²³ Huan yon na, yon noicnihua, yon notequivapanojaahua huan yon cati itztoyaj nohuaya amo timoquixtiliyayaj toyoyo huan nochipa tipixque toteposhua nechca tomax.

5

Quintzacuili que inincualanca itacahua cati yoltetique

¹ Teipa miyaqui tacame huan sihuame pejque quintatelhuíaj sequij israelita tacame cati tom-inpiyayaj pampa quintajtaniyayaj miyac tomi iniisraelita icnihua. ² Quijtohuayayaj: “Tojuanti tahuel timiyaquij ica nochí tocone hua huan yeca monequi timotanehuise trigo san para ica timopanoltise.” ³ Sequinoc quijtohuayayaj: “Ya tijtaminamacatoque total, tomil, toxocomecamil huan tochajchaj ica ni tacame cati tominpiyaj para ma techtanejtica tomi para amo timayan-camiquise ipan ni hueyi mayanti.” ⁴ Huan sequinoc quijtohuayayaj: “Monejqui timotanejque tomi para tijtaxtahuise ne tanahuatijquet nopa impuestos cati tajtanij por tomil huan toxocomecamil. ⁵ Huan masque tojuanti nochí tiisraelitame huan tiicnime ica san se toeso huan tocone-hua san se quej inincone hua, monequi tojuanti tiquinnamaquiltíaj tocone hua para ma quintequipanoca para inijuanti techtanejtise tomi. Sequij toichpocahua ya tiquinnamacatoque para quintequipanose san tapic huan ayecmo hueli titaxtahuase para tiquincuilise pampa total huan nochí cati tijpixtoyaj ayecmo toaxca.”

⁶ Huan quema na nijcajqui nochí cati techilhuijtoyaj, tahuel nicualanqui. ⁷ Teipa nimoyolilhui quenicitza nijchihuas. Huan niyajqui huan niquinajhuac nopa tequichihuani huan nopa tominpiyani huan niquinilhui: “¿Para ten quej ni anquinchihuiliáj amo israelita

icnihua? Amo xitahuac para antainamaj itanca tomi huan anquincuiláj inintal.” Nojquiya niteyolmelajqui para tijchihuase se hueyi tasentilisti para tijsencahuase ni tamanti.⁸ Huan nojquiya niquinilhui para hasta campa tihuelque sempa tiquincojtoyaj toisraelita icnihua cati monamacatoyaj para elis tetequipanohuani cati teaxca ipan sequinoc talme. Huan ama sempa anquinnamacaj amoicnihua para ma tetequipanoca san tapic. Huajca sempa monequi tiquincohuase para tiquinmanahuise.

Huan amo aqui technanquili pampa amo quimatque taya quiijtose.⁹ Huan na niquinilhui: “Amo cuali cati anquichihuaj. ¿Para ten amo anquitepanitaj Toteco Dios? ¿Para ten anquichihuaj cati ica tocualancaitacahua techpinajtise?¹⁰ Na huan nochaj ehuani nojquiya titetanejtijtoque tomi huan trigo, pero amo tiquintajtaniáj itanca. Huajca amojuanti ayecmo xiquininamacá israelitame itanca quema anquintanejtíaj tomi.¹¹ Huan nojquiya nimechtajtanía para nimantzi xiquincuepilica inimilhua, inixocomeca milhua, iniolivo milihua, ininchajchaj huan nochí itanca tomi cati anquininamayayaj por cati anquintanejtijtoyaj.”

¹² Huan nochí inijuanti tananquilijque: “Tiquincuepilise nochí cati iniaxca huan amo teno tiquininamase. Nochi cati tiquijtojtoc, tijchihuase.”

Huajca na niquinnotzqui nopa totajtzitzí para ma hualaca huan para inijuanti ma motestigoj-quetzaca iniixpa para, quena, quichihuase quej quiijtojque.¹³ Teipa nijtzejtzelo noyoyo huan

niquijto: “Quej ni ma quichihua Toteco Dios nopa tacat cati amo quinequis quichihuas cati quijjtojtoc para quichihuas.”

Huan nochí tananquilijque: “Quej nopa ma eli.” Huan quihueyichijque TOTECO huan quena, quichijque quej quijjtojtoyaj.

Nehemías quinpalehui imasehualhua

14 Na nipejqui nitequiti quej gobernador quema Artajerjes yahuiyaya para 20 xihuit tanahuatis huan techtitanqui para nielis gobernador nica ipan tali Judá. Huan nitequitic 12 xihuit hasta quema Artajerjes yahuiyaya para 32 xihuit tanahuatis. Huan ipan nochí nopa xihuit quema niitzoya quej gobernador amo quema, yon na, yon noicnihua amo tijselijque nopa taxtahuili cati techtocarohuayaya por totacualis o por totequi.

15 Pero cati elque gobernadores achtohuiya, quena, tahuel quininanque israelitame huan quinnahuatiyayaj ma quinhualiquilica inintacualis huan inixocomeca iayo mojmosta. Nojquiya quinnahuatiyayaj ma quinmacaca nechca tajco kilo ten plata. Huan hasta inintequipanojcahua nopa gobernadores nojquiya quininamayayaj. Pero na amo quema nijchijqui quej nopa pampa nijtepanita Toteco Dios. **16** Huan nojquiya na nitequitic chicahuac para nijcualchijchihuas nopa tepamit campa techmacaque ma nijchihua. Amo nijcojqui tali huan nochí notequipanojcahua mosentilijque para tequitise mojmosta. **17** Huan mojmosta ipan nomesa niquintamacayaya 150 israelitame huan tequichihuani. Huan

iyoca ajsiyayaj techpaxalohuaj tequichihuani cati hualayayaj ipan sequinoc talme cati monejqui ni quintamacas. ¹⁸ Huan mojmosta quisencahuayayaj para totacualis se hueyi toro, chicuase borregojme cati tomahuaque huan miyac patoxme huan huejhueyi totome. Huan sesen majtacti tonati titemacaque xocomecat iayo hasta mocahuayaya, pero amo quema ni quinilhui masehualme ma techtaxtahuica pampa nigobernador pampa nijmatiyaya para nelía ohui para panoj. ¹⁹ Huan nimotatajti: “NoTeco Dios, xiquelnamiqui nochí cati cuali nijchijtoc ica ni masehualme huan techmaca motatiochihualis.”

6

Tacame quicualancaitaque Nehemías

¹ Quema Sanbalat, Tobías, huan Gesem, nopa árabe tacat, huan sequinoc tocualancaitacahua quimatque para ya titantoyaj tijcualchijchihuaj nopa tepamit huan amo teno más polihuiyaya, san monequiyaya caltemit tijtatzquiltise, nelía cuanque. ² Huan Sanbalat huan Gesem techtitlanilijque se amatajcuiloli. Techilhuijque ma nimosentili inihuaya ipan se pilaltepetzi ipan nopa tamayamit cati itoca Ono. Pero na nijmachili para quinequiyayaj techmictise, ³ huajca na ni quintanili tayolmelahuani para quinilhuise: “Na nimotequihuía ipan se hueyi tequit huan amo hueli nijcrajtehuas. ¿Para ten monequi motilquetzas ni tequit para niquisas huan nitemos campa

amojuanti?” ⁴ Huan inijuanti quej nopa techtitanilijque camanali nahui huelta huan na san se niquinnanquiliyaya.

⁵ Teipa ica macuili huelta Sanbalat quititanqui itequipanojca ma techhualiquili seyoc amatajciviloli tapojtoc ipan imax, ⁶ huan ya ni quijito: “Campa hueli nochí quimati para ta huan nochí israelitame antasencahuaj para anmosentanchihuase ica totanahuati jca huan yeca anquicualtalíaj nopa tepamit. San se nojquiya quijtohua Gesem. Nojquiya quijtohuaj para timochihuas tiinintanahuati jca. ⁷ Huan quijtohuaj para ya tiquintalijtoc tajtolpanextiani para ma quijtoca ipan altepet Jerusalén para ta titanahuati jquet. Temachti quimatis Tanahuati jquet Artajerjes nochí ni camanali cati nemí. Huajca más cuál xihuala huan ticamanaltise san tojuanti.”

⁸ Huajca na nijcuepalti se amatajciviloli cati quijito: “Amo teno melahuac cati tiquijtojtoc. San tiistacati.”

⁹ Inijuanti san quinequiyayaj techmajmatise para ayecmo tijchihuase nopa tequit, pero na achi más nimoyolchicajqui. ¹⁰ Teipa niyajqui nijpaxaloto Semaías, icone Delaía huan iixhui Mehetabel. Yaya senitztoya ipan ichaj huan amo huelqui quisa. Yaya quijito para Toteco Dios quinojnotztoya para ma techilhui ma timosentilica ipan tiopa calijtic huan ma tijtzacuaca cuál nopa caltemit huan ma timotatica. Quijito para hualayayaj tacame nopa tayohua para techmictiquij. ¹¹ Huan na nijnanquili: “Tacame quej na

amo cholohuaj. Amo nitotajtzi para nicalaquis tiopan calijtic, yon para nijmanahuis nonemilis, huajca amo niyas.”

¹² Huan na nijmatqui para Toteco Dios amo quinojnotztoya. San quijtojtoya nopa camanali ten nopantis quej elisquía se tajtolpanextijquet pampa Sanbalat huan Tobías quitaxtahuijtoyaj.

¹³ Quitaxtahuiyayaj para ma techmajmati para ma nijchihua cati amo monequi huan ma nitajtacolchihua. Quej nopa quipiyasquíaj se camanali amo cuali ten na para techtatelhuise.

¹⁴ Huajca nimotatajti huan niquijto: “NoTeco Dios, xiquelnamiqui cati amo cuali quichijtoc Sanbalat huan Tobías. Nojquiya xiquelnamiqui cati fiero quichijtoc nopa sihua tajtolpanextijquet, Noadías, huan nochí nopa sequinoc tajtolpanextiani cati quinequij techmajmatise.” Quej nopa nimotatajti.

Quitamiltijke nopa tepamit

¹⁵ Huan tijtamiltijke tijcualchijchihuaj nopa tepamit ipan 25 itequi metzti Elul ipan toisraelita xihui*. Huajca ten ipejya totequi hasta tijtamiltijke tijcualchijchijke nopa tepamit elqui 52 tonati. ¹⁶ Huan quema quimatque tocualancaitacahua huan nopa masehualme ipan nochí talme cati quiyahualojoque altepet Jerusalén para tijtamiltijke nopa tequit, tahuel momajmatijke pampa quimachilijque para san ica ichicahualis Toteco Dios tijtamiltijke nopa tequit.

* **6:15** 6:15 Elqui ipan se 2 itequi octubre ipan tocalendario ten ama.

¹⁷ Huan ipan nopa 52 tonati nopa tayacanca tacame ipan tali Judá quititaniliyayaj miyac amatajcuiloli Tobías, huan nimantzi quincuepaltiyaya. ¹⁸ Quej nopa quichijque pampa miyac tacame ten tali Judá motemacatojaj ihuaya Tobías pampa imontaj eliyaya Secanías, icono Ara. Nojquiya icono Tobías cati itoca Johanán mosihuajtijtoya ica iichpoca Mesulam, icono Berequías. ¹⁹ Talojtzitzti nopa tayacanca tacame hualayayaj huan techpohuiliyayaj para nelía se cuali tacat Tobías huan sempa yahuiyayaj quipohuiliyayaj Tobías nochí cati na niquipijtohuayaya. Huan Tobías nojquiya techtitaniliyaya miyac amatajcuiloli para techmajmatis.

7

*Hanani huan Hananías quimocuitahuijque
Jerusalén*

¹ Quema ya tjsencajtoyaj nopa tepamit cati quiyahualo altepet Jerusalén huan nochí icaltehua ya tijtatzquiltijtoyaj, tiquintequimacaque caltemit tamocuitahuiani, huicani huan levitame para tamocuitahuise. ² Huan nijtequimacac ma quipiya tanahuatili ipan nopa altepet noicni Hanani huan Hananías cati eliyaya capitán ten soldados ipan nopa cuartel cati eltoya nopona. Hananías eliyaya se tacat cati nelía temachti huan tahuel quitepanitayaya Toteco Dios huan amo quej sequinoc. ³ Huan na niquinilhui: “Amo xijtapoca caltemit ten Jerusalén hasta quema ya quistos cuali tonati huan sempa xijtzacuaca nopa

caltemit quema noja itztose tamocuitahuiani. Huan xijtzacuaca nopa caltemit cuali huan xitalica nopa hueyi teposbarra. Huan nojquiya xi quintequimacaca tacame cati Jerusalén ehuani para ma tamocuitahuica. Sese ma quipiya itequi campa ta tijtalis o nechca ichaj.”

*Inintoca cati tacuepilijque ten tali Babilonia
(Esd. 2:1-70)*

⁴ Niquilhui ya nopa pampa nopa altepet eliyaya tahuel hueyi huan pilquentzi masehualme itztoyaj nopona pampa ayemo oncayaya calme tasencahuali. ⁵ Huan Toteco Dios techyoltacani para ma niquisentili noch i tayacanca tacame, noch i tequichihuani, huan noch i masehualme para ma moi jcuiloca por familias. Ya nijpanti se amatapohuali ica inintoca cati achtohuiya mocuectoyaj huan ya ni cati ijcuilijtoc ipani:

⁶ “Nica eltoc inintoca nopa israelitame cati ehuani ipan altepet Jerusalén huan campa hueli ipan tali Judá cati Nabucodonosor quinhuicac ipan tali Babilonia para tetequipanotij huan teipa sempa mocuetque ipan Jerusalén huan ipan nopa sequinoc pilaltepetzitz campa ehuayayaj. ⁷⁻²⁵ Tacuepilijque inihuaya nopa tayacanani cati inintoca eliyaya Zorobabel, Jesúa, Nehemías, Azarías, Raamías, Nahamani, Mardoqueo, Bilsán, Misperet, Bigvai, Nehum huan Baana. Nica techilhuía ipan taya familia hualajque nopa tacame huan quesqui ten inijuanti mocuetque ten nopa familia.

Familia, Quesqui

Paros, 2,172
 Sefatías, 372
 Ara, 652
 Pahat Moab por Jesúa huan Joab, 2,818
 Elam, 1,254
 Zatu, 845
 Zacai, 760
 Binúi, 648
 Bebai, 628
 Azgad, 2,622
 Adonicam, 667
 Bigvai, 2,067
 Adín, 655
 Ezequías por icone Ater, 98
 Hasum, 328
 Bezai, 324
 Harif, 112
 Gabaón, 95

26-38 “Huan nica techilhuía inialtepe campa hualajque nopa tacame huan quesqui inijuanti mocuetque ten nopa altepet.

Altepét, Quesqui
 Belén huan Netofa, 188
 Anatot, 128
 Bet Azmavet, 42
 Quiriat Jearim, Cafira huan Beerot, 743
 Ramá huan Geba, 621
 Micmas, 122
 Betel huan Hai, 123
 nopa seyoc altepet Nebo, 52
 nopa seyoc altepet Elam, 1,254
 Harim, 320
 Jericó, 345

Lod, Hadid huan Ono, 721
Senaa, 3,930

Totajtzitzi cati mocuetque

39-42 “Huan nica techilhuía quesqui totajtzitzi tacuepilijque ten tali Babilonia huan ipan catijqui familia hualajque.

Familia, Quesqui
Jedaías, 973
Imer, 1,052
Pasur, 1,247
Harim, 1,017

Levitame cati tacuepilijque

43 Tacuepilijque 74 levitame cati itztoyaj iixhuihua Josué por Jesúa huan Cadmiel.

44 Tacuepilijque 148 huicani cati itztoya iixhuihua Asaf.

45 Tacuepilijque 138 tiopan caltemit tamocuitahuiani cati itztoyaj iniihxuihua Salum, Ater, Talmón, Acub, Hatita huan Sobai.

46 Huan tacuepilijque tiopan calijtic tequipanohuani cati itztoyaj iniihxuihua:

Ziha, Hasufa, Tabaot,

47 Queros, Siaha, Padón,

48 Lebana, Hagaba, Salmai,

49 Hanán, Gidel, Gahar,

50 Reaía, Rezín, Necoda,

51 Gazam, Uza, Paseah,

52 Besai, Mehunim, Nefisesim,

53 Bacbuc, Hacufa, Harhur,

54 Bazlut, Mehída, Harsa,

55 Barcos, Sísara, Tema,

56 Nezía huan Hatifa.

57 “Huan tacuepilijque ininteipa ixhuihua ite-
quipanojcahua Salomón cati inintoca eliyaya:

Sotai, Soferet, Perida,

58 Jaala, Darcón, Gidel,

59 Sefatías, Hatil, Poqueret Hazebaim huan Amón.

60 Huajca para nochí tacuepilijque 392 cati
eliyaya j iniihxuihua nopa tequipanohuani
cati tequitiyaya j tiopan calijtic huan cati
eliyaya j iniihxuihua itequipanojcahua
Salomón.

61 “Huan ipan nopa tonali nojquiya tacuepili-
jque sequinoc tacame ten altepet Tel Mela, Tel
Harsa, Querub, Adón huan Imer ipan tali Per-
sia, pero amo quipantijque inintoca ipan nopa
amatapohuali huan amo huelque quiixnextijque
ajquiya intata, yon inihueyi tata, yon sinta nelía
eliyaya j israelitame. **62** Elque 642 ten ni tacame
huan elque iixhuihua:

Delaía, Tobías huan Necoda.

63 “Huan tacuepilijque nopa totajtzitzi cati
eliyaya j iixhuihua Habaía, Cos huan Barzilai cati
motalnamicti ihuaya se iichpoca Barzilai ten tali
Galaad huan quicuili itoca isihua.

64 “Nochí ni totajtzitzi quintemojque inintoca
ipan nopa amatapohuali huan amo quipanti-
jque. Huajca amo quintequimacaque quej tota-
jtzitzi pampa amo quimatque sinta tapajpactique
o amo. **65** Huan na nigobernador niquinilhui ma
amo quicuaca tacualisti cati tatzejtzeloltic para
totajtzitzi hasta quema quitajtanise TOTECÓ ica
nopa piltetzitzi cati itoca Urim huan Tumim, nopa

dados tatzejzeloltic, para quimatise sinta eliyayaj totajtzitzi o amo.

⁶⁶ “Huajca ica nochí cati tacuepilijque ipan tali Judá elque 42,360 masehualme. ⁶⁷ Huan nojquiya tacuepilijque 7,337 inintequivpanojcahua, tacame huan sihuame. Huan tacuepilijque 245 huicani, tacame huan sihuame. ⁶⁸ Huan quinhualicatojaj inihuaya 736 cahuayojme, 245 mulas, ⁶⁹ 435 camellos huan 6,720 burrojme.

⁷⁰ “Huan sequij tayacanani ipan familias tapalehuijque ica tomi para nopa tequit. Huan na cati nigobernador nitemacac 8 kilos huan tajco ten oro, 50 tazas huan 530 iniyoyo totajtzitzi. ⁷¹ Huan sequij tetatme ipan familias temacaque 170 kilos ten oro huan 1,210 kilos ten plata. ⁷² Huan nochí sequinoc cati itztoyaj ipan nopa altepet temacaque 170 kilos ten oro, huan se mil cien kilos ten plata, huan 67 iniyoyo totajtzitzi.

⁷³ “Huan teipa nochí totajtzitzi, levitame, caltemit tamocuitahuiani, huicani huan cati tequipanohuayayaj ipan tiopamit, huan nochí sequinoc israelitame tacuepilijque ipan inialtepe campa ehuani huan mochantijque.”

Esdras tepohuili itanahuatilhua Moisés

Huan quema ajsic nopa metzti chicome ipan toisraelita xihui*, nochí nopa israelitame ya quipixtoyaj ininchajchaj para ipan itztose ipan inialtepe.

* **7:73** 7:73 Elqui ipan octubre o noviembre ipan tocalendario ten ama.

8

¹ Huan ipan nopa achtohui tonali ten nopa metzti chicome*, nochi nopa masehualme quej san se tacat mosentilijque campa quichihuaj tianquis ipan Jerusalén iixmelac nopa At Caltemit. Huan quilhuijque tamachtijquet Esdras ma quihualica nopa amatapohuali cati quipixqui nopa tanahuatilme cati huejcajquiya TOTECO quinmacatoya israelitame ica Moisés para quipohuas iniixpa. ² Huajca nopa totajtzi Esdras quihualicac nopa amatapohuali iniixpa nopa tasentili ipan nopa achtohui tonali ipan nopa metzti. Nopona itztoyaj nochi tacame, sihuame huan coneme cati hueliyayaj tamachilíaj. ³ Huan Esdras pejqui quipoqua nopa amatapohuali ica ijnaloc huan quipojqui hasta tajco tona ipan nopa plaza cati eltoya iixmelac nopa At Caltemit iniixpa nopa tacame, sihuame huan nochi coneme cati hueliyayaj quimachilíaj.

Huan nochi nopa masehualme tacactoyaj para quimachilise cuali nopa tanahuatilme cati TOTECO quinmacatoya. ⁴ Huan Esdras moquetztoya taixpa huejcapa ipan se tapechti cati quicualchijchijtoyaj ica huapali para ipan ma moquetza para nochi huelise quiitase. Huan ipan nopa tapechti ipan inejmat moquetztoya Matatías, Sema, Anías, Urías, Hilcías huan Maasías. Huan iarravesco moquetztoya Pedaías, Misael, Malquías, Hasum, Hasbadana, Zacarías huan Mesulam. ⁵ Huan Esdras quitapo nopa amatapohuali huan nochi hueliyayaj quiitaj

* **8:1** 8:1 Elqui huejcajquiya ipan se 8 itequi octubre ipan tocalendario ten ama.

pampa itztoya huejcapa. Huan quema pejqui tapohua, nochí nopa masehualme moquetzque.

⁶ Huan Esdras quipaquilismacac TOTECO, nopa Dios catí tahuel hueyi huan nochí quinanquilijque icamanal ica: “Quej nopa melahuac.” Huan momatananque para ilhuicac. Teipa motancuaquetzque huan mohujtzonque hasta talchi huan quihueyichijque TOTECO.

⁷ Huan nopa levitame: Jesúa, Bani, Serebías, Jamín, Acub, Sabetai, Hodías, Maasías, Kelita, Azarías, Jozabed, Hanán huan Pelaía; quixtomayayaj nopa tanahuatilme catí quipohuayaya para nochí huelque quimachilíaj.

⁸ Huan inijuanti quipojque chicahuac para nochí quicaquise huan teipa nopa levitame quinmachtijque masehualme taya quinequi quiijtos sesen tamachtili para ma quimachilica cuali huan nochí huelque quimachilijque.

⁹ Huan nochí nopa masehualme chocayayaj quema quicauiyayaj itanahuatilhua TOTECO. Huajca na niNehemías nigobernador, huan Esdras nopa tamachtijquet huan nopa levitame tiquinilhuijque ma amo chocaca huan para nopa tonali eliyaya tatzejzeloltic para TOTECO toDIOS huan para ma amo mocuesoca yon ma amo chocaca. ¹⁰ Huan nojquiya Esdras quinilhui: “Xiyaca xiyołpactoca. Xijcuatiј tacualisti catí más cuali huan xiquitij xocomecat iayo catí más tzopelic. Nojquiya xiquintitanilica tacualisti catí teicneltzitzi huan amo teno quipiyaj para quicualtalise. Ama ni tonal eltoc tatzejzeloltic huan taiyocatalili para Toteco. Amo ximocuesoca pampa nopa

paquilisti cati tijpiyaj ipan TOTECO techmaca chicahualisti.”

¹¹ Huan nopa levitame nojquiya quinyoltaliyayaj nopa masehualme huan quinilhuiyayaj: “Amo ximocuesoca pampa tatzejtzelotic ni tonal para TOTECO.” ¹² Huajca nochí nopa masehualme yajque para quicuatij huan quitiij cati más cuali huan quititanque tacualisti para cati teicneltzitz. Huan nochí mopaquilismacaque huan ilhuichijque pampa quicactoyaj icamanal TOTECO cati quinpohuilijtoyaj huan quinmachtijtoyaj.

Quichijque nopa Ilhuit ten Pilxajcaltzitz

¹³ Huan tonili nochí cati tayacanca tetatme, nopa totajtzitz huan nopa levitame mosentilijque ihuaya nopa tamachtijquet Esdras para quipohuase ica más tamocuitahuili nopa amatapohuali para noja más quimachilise. ¹⁴ Huan quipantijque nopa tanahuatili campa TOTECO quinahuatijtoya Moisés para nochí israelitame ma quichihuaca pilxajcaltzitz sesen xihuit huan ipan itztose ipan nopa Ilhuit ten Pilxajcaltzitz. ¹⁵ Huajca quintitanque tayolmelahuani campa hueli ipan nochí altepeme huan ipan Jerusalén para teyolmelahuase. Quinilhuijque nochí israelitame ma quisaca quitemotij imacuayohua olivo cuame, apachij cuame, higo cuame o ten hueli cuahuit cati quipiya miyac ixihuiyo cati taecahuilia para ica mochantise quej TOTECO tanahuatijtoya. ¹⁶ Huajca nochí israelitame yaque cuatita quitemotoj cati ica moxajcaltise. Huan nochí quichijque pilxajcaltzitz huejcapa

ten ininchajchaj, o ipan inincalixpa, o icalixpa tiopamit, o ipan nopa plazas iniixmelac nopa At Caltemit huan Efraín Caltemit. ¹⁷ Huajca nochí israelitame cati mocuectoyaj ten campa quinhuicatoyaj tetequipanotij mocajque ipan nopa pilxajcaltzitzí cati quichijtoyaj para 7 tonati. Huan nochí tahuel yolpajque para sempa quitoquilise nopa tanahuatili cati amo nochí quitoquilijtoyaj hasta quema Josué, icono Nun, huejcajquiya quinyacanayaya israelitame. ¹⁸ Huan ipan sesen ten nopa chicome tonati ipan nopa ilhuit Esdras quipojqui nopa amatapohuali cati quipixtoya itanahuatilhua Toteco Dios. Huan ipan tonali chicueyi quipixque se hueyi tasentili para quihueyichihiase Toteco quej quijto nopa tanahuatili ma quichihuaca.

9

Israelitame mosajque huan quipohuilijque TOTECO inintajtacolhua

¹ Huan teipa ipan 24 itequi nopa chicome metzti ipan toisraelita xihui*, mosentilijque nochí israelitame para mosahuase. Huan mosajque huan moquentijque yoyomit cati fiero huan motemilijque tali ipan inintzonco para quinextise initequipachol por inintajtacolhua. ² Huan moiyo catalijque ica masehualme cati amo israelitame huan nochí moquetzque huan iixpa TOTECO quiteñpojque inintajtacolhua huan inintajtacolhua inintatahua. ³ Huan para eyi horas mojmosta

* **9:1** 9:1 Elqui ipan 31 itequi octubre ipan tocalendario ten ama.

inijuanti mocahuayayaj ijcatoque huan se quinpo huiliyaya ten nopa amatapohuali ica itanahuatilhua TOTECO Dios. Huan para seyoc eyi horas mojmosta quipo huiliyaya j TOTECO Dios inintajtacolhua huan quihueyichihiuayayaj. ⁴ Huan tahuejcapa ipan nopa escalones moquetzayayaj nopa levitame: Jesúa, Bani, Cadmiel, Sebanías, Buni, Serebías, Bani huan Quenani. Huan chicahuac quinojnotzayayaj TOTECO Dios. ⁵ Huan teipa nopa tayacanca levitame, Jesúa, Cadmiel, Bani, Hasabnías, Serebías, Hodías, Sebanías huan Petaías quinlhuijque nopa masehualme: "Ximoquetzaca huan xijhueyichihiuaca TOTECO Dios catí ipa itztoya para nochipa huan para nochipa itztos." Huan quiijo que:

"Nochi ma timitzhueyichihiuaca huan ma timitzpaquilismacaca, TOTECO Dios, pampa ta tahuel tihueyi huan tahuel ticuajcualtzi. ⁶ TOTECO, santa tiyoytzi tiDios huan amo aquí seyoc. Ta tijchijqui ilhuicacti campa tiitztoc huan nopa ilhuicacti campa sitalime. San ta tijchijchijqui taltipacti huan nochí catí onca ipani. San ta tijchijchijqui nochí huejhueyi at huan nochí catí noppóna itztoque. Ta tiquinmaca nemilisti nochí catí itztoque. Nochi ilhuicac ehuani ipan ilhuicacti motancuaquetzaj moixpa ta.

⁷ "Ta titTOTECO Dios catí tijtapejpeni Abram huan tijquixti ipan tali Ur, inintal nopa caldeos huan tijtocaxtali Abraham. ⁸ Tiquitac para temachti iyolo moixpa. Huan ihuaya tijchijqui se camanal sencahualli para tiquinmacasquía iixhuihua nopa talme catí iniaxcahua nopa cananeos, heteos, amorreos, ferezos, jebuseos,

huan gergeseos. Huan tijtamichijtoc nochí catí tijtencajqui pampa nelía tixitahuac.

⁹ “Ta tiquitac quenicatza taijyohuiyayaj tohuejcapan tatahua ipan tali Egipto. Tijcajqui quema mitztajtanijque tapalehuili iteno nopa Hueyi At Chichiltic. ¹⁰ Huan tijchijqui huejhueyi tanextili huan tidochicahualnescayo iixpa Faraón, huan nochí itequipanojcahua huan nochí ten tali Egipto ehuani. Tiquinmanahui israelitame inimaco pampa tiquitac quenicatza mohueyimatiyayaj Egipto ehuani huan quenicatza quinchihuiliyayaj catí fiero. Huajca tijchijqui para nochí masehualme ma mitzixmatica huan hasta ama nochí mitzixmatij para tahuel hueyi mochicahualis. ¹¹ Tijxelo nopa hueyi at iniixpa huan nochí israelitame panoque tatajco hueyi at ipan tali huactoc. Huan nochí inincualancaitacahua tiquinmajcajqui campa más huejcata quej quiisahuíaj se tet huan yahui hasta atzinta huan nopona mocahua. ¹² Tonaya tiquinyacanqui ipan ojti ica se hueyi mixti huan tayohua ica se hueyi tilemecti para taahuijtiyas campa nejnen-tyahuiyayaj.

¹³ “Ta tihualtemoc ipan nopa tepet Sinaí, huan ticamanaltic inihuaya israelitame huan tiquinmacac cuali tamachtilme huan tanahuatilme catí xitahuac, huan catí melahuac huan catí cuali. ¹⁴ Tiquinmacac tanahuatilme ten quenicatza ma mosiyajquetzase ipan sábado nopa tonal catí taiyocatalili para ta. Quena, ica motequipanojca Moisés tiquinmacac tanahuatilme huan tamachtilme para ma quichihuaca. ¹⁵ Tiquinmacac pantzi catí huetzqui

ten ilhuicac quema mayanayabaj. Huan quema amiquiyabaj, ta tijchijqui ma quisá at ipan se hueyi tet. Huan tiquinilhui ma calaquica huan ma moaxcatica nopa tali cati tiquintencahuili tiquinmacasquía.

¹⁶ “Pero tohuejcapán tatahua tahuel mohueyi-matque huan moyoltetilijque huan amo quitepanitaque motanahuatil. ¹⁷ Amo quinejque mitz-tacaquilise. Amo quielnamijque nochí nopa ti-o-chicahualnescayot cati ta tijchijqui iniixpa. Hua-jca motzontochonchijque huan quitalijque se tay-acanquet para sempa quinhuicasquía ipan tali Egipto campa tetequipanohuayabaj san tapic. Pero ta, tiToteco Dios titetapojo-polhuía huan tijpiya hueyi moyolo. Ta amo nimantzi ticualani. Tite-tasojta huan hueyi motaicnelil, yeca amo tiquintahuelcajqui.

¹⁸ “Masque quichijque se becerro ten oro, huan masque quijijoque para ya nopa elqui inindios cati quinquixti ipan tali Egipto, huan tahuel hueyi mitzmahuispoloijque, ¹⁹ ta cati tahuel hueyi motaicnelil, amo tiquincajejqui ipan huactoc tali campa amo teno onca. Amo tiquinquixtili nopa hueyi mixti cati quinyacanqui tonaya, yon nopa tilelemecti cati quintaahuili tayohua para ma quimatica catijqui ojti ipan yase. ²⁰ Huan tiquinmacac moTonaltzi cati cuali para quinmachtis. Amo tiquinquixtili nopa maná cati eliyaya in-intacualis. Yon amo tiquinquixtili at quema amiquiyaya. ²¹ Para 40 xihuit tiquinmacayaya nochí cati monejqui ipan nopa huactoc tali huan amo teno quinpolo. Iniyoyo amo sosolijqui huan iniicxi amo sesemacac.

22 “Tiquinpalehui para quintanque miyac tanahuatiani huan talme ica miyac inimasehualhua. Tiquinmacac talme hasta nopa nepamit cati más huejca. Moaxcatijke Hesbón cati eliyaya ital Tanahuatijquet Sehón huan moaxcatijke Basán cati eliyaya ital Tanahuatijquet Og. **23** Huan tiquinmiyaquili ininconehua quej elisquíaj sitalime ipan ilhuicac. Huan tiquinhualicac ipan ni tali cati tiquinilhuijtoya inintatahua ma calaquica huan ma moaxcatica. **24** Huajca elque ininconehua cati hualajque ipan ni tali huan moaxcatijke. Iniixpa tiquintanque nopa cananeos cati achtohuiya itztoyaj nica. Tiquinmactili israelitame inintanahuatijcahua cananeos inihuaya inimasehualhua para ma quinchihuilica cati inijuanti quinequisquíaj. **25** Huan inijuanti calajque campa altepeme cati más cuali tasencahuali, huan ipan talme cati más cuali. Moaxcatijke calme cati tejtemitoya ica noch tamanti cati más cuali huan amelme cati ya taxahuali. Moaxcatijke xocomeca milme, huan olivo milme huan milme ica noch tamanti cuame cati ya quipiyayayaj inintajca hasta mocahua. Huan quicuajque hasta cuali ixhuique, huan hasta motomajque huan tahuel pajque ica noch cati cuali tiquinchihuilijtoya.

26 “Pero masque quej nopa tiquintiochijqui, amo mitztepanitaque. San motzontochonojque huan amo quinejque quiitase motanahuatilhua. Quinmictijke motajtolpanextijcahua cati quinnojnotzayayaj chicahuac para ma moyolcuepac a ica ta. Tahuel mitzixpanoche. **27** Huajca yeca tiquintemactili inimaco inincualancaitacahua

para ma quintaijyohuilitca. Huan quema taijyohuiyayaj, mitztajtanijque xiquinpalehui, huan ta ica mohueyi taicnelilis, tiquintacaquili huan tiquinmacac tamanahuiani para ma quinmaquixtca inimaco inincualancaitacahua.

28 “Pero quema ya oncayaya se quentzi tasehuilisti, inijuanti sempa quichihuayayaj cati fiero moixpa huan yeca tiquincajqui ma huetzica inimaco inincualancaitacahua para inijuanti ma quintanica. Huan yeca sempa mitztajtanijque motapalehuil huan ta, ten ilhuicac, tiquintacaquili huan pampa tiquintasojtac, tiquinmanahui ten inincualancaitacahua. Huan quej nopa panoc miyac huelta.

29 “Tiquinilhuiyaya sempa ma quichihuaca cati quiijtohua motanahuatilhua, pero inijuanti tahuel motepanitayayaj huan amo quicajque cati tiquinnahuati. Noja más quiixpanoche motanahuatilhua cati quichihua para masehualme ma itztoca ica cuali sintia quitoquilíaj. Pero inijuanti más motzontochonchijque, huan moyoltetilijque huan amo mitztacaquilijque. **30** Huan para miyac xihuit tijpixqui hueyi moyolo ica inijuanti. Huan ica motonal tijnequiyaya tiquintalnamiquiltis pampa tiquinmacac motajtolpanextijca mocamanal para quinilhuise taya inintajtacolhua, pero inijuanti amo quintacaquilijque. Huajca yeca tiquintemactili sempa inimaco inincualancaitacahua ipan ni tali para ma quintatzacultica. **31** Pero pampa ta tahuel titetasoja, amo tiquintzontamilti, yon

amo tiquintahuelcajqui pampa ta tiToteco Dios cati hueyi moyolo huan tahuel titeicnelía.

32 “Toteco Dios, ta cati tihueyi huan tijpiya hueyi mochicahualis. Ta cati titemajmati huan titjamichhua nochi cati tijtencahua para tijchihuas, ama na nimitztajtanía amo xiquelcahua totaijyohuilis. Amo xiquelcahua quenicatza taijyohuijtoque totanahuatijcahua, totayacancahua, totajtzitzi, totajtolpanextijca, tohuejcapan tatahua huan nochi momasehualhua ten quema nopa Asiria tanahuatiani techtanque huan hasta ama ni tonali. **33** Ta amo motajtacol nochi cati techpanotihualajtoc pampa ta tijchijtoc cati xitahuac huan tojuanti tahuel titajtacolchijtoque. **34** Totanahuatijcahua, totayacancahua, totajtzitzi huan tohuejcapan tatahua amo quitoquilijque motanahuatilhua. Amo quitacaquilijque cati tiquinilhuiyaya ma quichihuaca. **35** Quema ajsitoj ipan inintal huan quipixque inintanahuatijcahua pampa tiquintiochijqui miyac, amo mitzhueyitalijque. Masque tiquinmacac hueyi tali cati miyac itajca, amo quicajque inintajtacolhua.

36 “Huan ama timocuectoque titetequipanohuani ipan ni cuali tali cati tiquinmacac tohuejcapan tatahua para ma quicuaca nochi cati cuali quipiya. **37** Pero ama nochi cuactacti cati onca mocahua para tanahuatiani cati ta tiquintalijtoc para technahuatise por totajtacolhua. Nojquiya tojuanti totacayohua huan totapiyalhua tiitztoque inimaco para ma techchihuilica cati quinequij huan yeca miyac titaijyohuiáj.

Inintoca cati motemacaque para quite-quipanose TOTECO

³⁸ “Pero masque nochí ni tamanti panotoc, ama tojuanti tijchihuaj ni tajcuijoli campa tojuanti, totayacanahua, tolevitajhua huan tototajtzitzí timotemacaj para temachti tijtoquilise motanahuatilhua huan yeca nochí tojuanti tijtalíaj totoca ipan ni tajcuijoli.”

10

¹ Huan nica eltoc totoca tojuanti cati timotocax-talijque ipan amat:

Na niNehemías, niicone Hacaliás, cati nigobernador.

Huan totajtzitzí cati motocaxtalijque elque Sede-quías, ² Seraías, Azarías, Jeremías,

³ Pasur, Amarías, Malquías.

⁴ Hatús, Sebanías, Maluc,

⁵ Harim, Meremot, Obadías,

⁶ Daniel, Ginetón, Baruc,

⁷ Mesulam, Abías, Mijamín,

⁸ Maazías, Bilgai huan Semaías.

⁹ Huan levitame cati motocaxtalijque elque:
Jesúa, icono Azanías, Binúi cati se iixhui Henedad huan Cadmiel,

¹⁰ ihuaya inilevita icnihua: Sebanías,

Hodías, Kelita, Pelaías, Hanán,

¹¹ Micaía, Rehob, Hasabías,

¹² Zacur, Serebías, Sebanías,

¹³ Hodías, Bani huan Beninu.

¹⁴ Huan motocaxtalijque tayacanani ipan nopa masehualme:

Paros, Pahat Moab, Elam, Zatu, Bani,

¹⁵ Buni, Azgad, Bebai,

- 16 Adonías, Bigvai, Adín,
- 17 Ater, Ezequías, Azur,
- 18 Hodías, Hasum, Bezai,
- 19 Harif, Anatot, Nebai,
- 20 Magpías, Mesulam, Hezir,
- 21 Mesezabeel, Sadoc, Jadúa,
- 22 Pelatías, Hanán, Anaías,
- 23 Oseas, Hananías, Hasub,
- 24 Halohes, Pilha, Sobec,
- 25 Rehum, Hasabna, Maasías,
- 26 Ahías, Hanán, Anán,
- 27 Maluc, Harim huan Baana.

Israelitame quitestigojquetzque Toteco nochicati quichihuasquíaj

28 “Huan nochí sequinoc masehualme, nopa sequinoc totajtzitzi, levitame, caltemit tamocuitahuiani, huicani, tiopa tequipanohuani huan nochí sequinoc cati moiycatalijque ten masehualme cati amo quiixmatij Toteco Dios cati nopona itztoyaj, nochí motemacaque para quitequipanose Toteco Dios inihuaya inisihuajhua huan ininconehua cati ya hueliyayaj tamachilíaj, 29 nochí mosentilijque huan sentic inihuaya iniicnihua huan inintayacancahua tatestigojquetzque para quitamichihuase nochí itanahuatilhua Toteco Dios cati quinmacatoya ica itequipanojca Moisés. Nojquiya tatestigojquetzque para quichihuase nochí camanali, tamachtilme huan leyes cati TOTECO quinilhuijtoc. Huan sinta amo, huajca inijuanti quiselisquíaj nochí nopa tatelchihualisti cati quinamiqui quinajsis.

30 “Huan nochí nopa masehualme quijitojque: Tijcahuaj tocamanal para amo tiquincahuilise toichpocahua ma monamictica inihuaya tacame cati amo israelitame, huan yon totelpocahua inihuaya ichpocame cati amo israelitame.

31 “Sinta masehualme cati amo israelitame quihualicase tamanti para quinamacase ipan sábado quema timosiyajquetzaj o ipan ten hueli tonali cati tatzejzeloltic para TOTECO, amo tiquintacohuilise. Nojquiya quema ajsi nopa chicome xihuit tijcahuilise ma mosiyajquetza nopa tali huan amo teno tijtocase huan tiquintapojojhuiuse nochí israelitame cati techtahuiquiliaj.

32 “ ‘Nojquiya tiquijtohuaj para sesen xihuit itemacase nahui gramos ten plata tomi para itiopa Toteco Dios huan nochí itequi. **33** Elis para nopa pantzi cati quinextíaj iixpa, huan para nopa tacajcahualisti ten harina, huan nopa tacajcahualisti tatatili cati talojtzitzí monequi, huan nopa tacajcahualisti ipan tonali para ma timosiyajquetzaca, huan quema yancuic metzti, huan nochí nopa ilhuime cati yaya quitalijtoc. Nojquiya elis para titaxtahuase ica tamanti tatzejzelotique, huan nopa tacajcahualisti para tajtacoli para quiixtzacuas totajtacolhua tiisraelitame iixpa, huan nochí sequinoc tamantzitzí cati monequi motequihuis ipan itiopa Toteco Dios.

34 “ ‘Nojquiya timahuiltijtoque ica nopa pillettzitzí para tijmatise catijqui familia ten totajtzitzí, tolevita icnihua o sequinoc tiisraelitame techtocarohua para ma tijhuicaca cuahuit huan ipan catijqui tonali ipan sesen xihuit monequi tijhuicase nopa cuahuit para quitatise ipan itaixpa

Toteco Dios quej yaya tanahuati ma tijchihuaca ipan itanahuatilhua.

³⁵ “ ‘Nojquiya sesen xihuit titatestigojquetzaj para tijhuicase ipan itiopa TOTECO itajca cati achtohui quisa ten cati tijtojque huan inintajca cati achtohui temacaj nochí cuame cati tijpiyaj.

³⁶ “ ‘Nojquiya tiquijtohuaj para tijhuicase ipan itiopa Toteco Dios toachtohui cone, huan iniachtohui cone hua tohuacaxhua huan toborregojhua. Huan tiquinmacase nopa totajtzitzi cati quitequipanohuaj Toteco Dios quej quiijtohua nopa tanahuatilme.

³⁷ “ ‘Nojquiya tijhualicase para nopa totajtzitzi nopa achtohui harina, nopa achtohui cuatacti ten sesen cuahuit, nopa achtohui xocomecat iayo huan nopa achtohui aceite hasta campa quiajocuise ipan tiopamit. Huan para nopa levitame, tijhuicase se chiquihuit ipan sesen majtacti chiquihuit ten nochí cati temaca total huan ya nopa elis todiezmo. Huan nopa levitame quiselise huan quisentilise ipan nochí topilaltepehua pampa quej nopa inintequi.

³⁸ “ ‘Huan nopona inihuaya nopa levitame cati quiselíaj diezmos itztos se totajtzi cati se iixhui Aarón. Huan se chiquihuit ten sesen majtacti chiquihuime cati quiselise para diezmos ten tacualisti, nopa levitame quiajocuise ipan nopa cuarto ipan itiopa Toteco Dios campa taa jocuij. ³⁹ Pampa israelitame inihuaya nopa levitame quintequimacatoc Toteco Dios para quiajocuise nopa tacajcahualisti ten trigo, xocomecat iayo huan aceite ipan nopa cali campa quinajocuij nopa tamanti tatzejzeloltic para quitequihuise

totajtzitzi huan caltemit tamocuitahuiani huan huicani.

“ ‘Huajca nica tijcahuaj tocamanal para amo tijcahuase tijmacase itiopa Toteco Dios cati monequi nopona.’ ”

11

*Nopa yancuic ehuani ipan altepet Jerusalén
(1 Cr. 9:1-34)*

¹ Nopa tayacanani ten israelitame ya mocahuayayaj para itztose ipan altepet Jerusalén. Pero nochí sequinoc israelitame monejqui mahuiltise ica piltetzitzi para quiitase ajquiya más itztoqui nopona pampa monequi se ipan sesen majtacti tacame mochantis para mocahuas ipan altepet Jerusalén, nopa altepet tatzejzelotic para TOTECO. Huan nopa seyoc chicnahui yasquíaj itztotij ipan sequinoc altepeme. ² Huan sequij tacame ica ininpaquilis motemacaque para mocahuase ipan altepet Jerusalén. Huan nochí israelitame quintiochijque pampa quej nopa monequiyaya.

³ Huan ya ni inintoca nopa tayacanani ipan sequinoc estados cati mocahuacoj ipan Jerusalén. Nechca nochí masehualme, totajtzitzi, levitame, tiopa tequipanohuani huan iniixhuihua Salomón inintequipanojcahua noja mocajque ipan ininchajchaj ipan miyac pilaltepetzitzti ipan tali Judá. Pero sequij masehualme ten tali Judá hualajque huan mochantijque ipan altepet Jerusalén.

⁴ Sequij masehualme ten nopa huejhueyi familias Judá huan Benjamín hualajque para mocahuase ipan altepet Jerusalén.

Ten iixhuihua Judá mocajque ipan Jerusalén:
 Ataías, icone Uzías, cati elqui icone Zacarías, cati
 elqui icone Amarías, cati elqui icone Se-
 fatías, cati elqui icone Mahalaleel, cati elqui
 se ipan ifamilia Fares. ⁵ Nojquiya hualajqui Maasías, icone Baruc, cati elqui icone Colhoze, cati elqui icone Hazaías, cati elqui icone Adaías, cati elqui icone Joiarib, icone Zacarías, cati elqui icone Siloni.

⁶ Huajca para nochí sequinoc cati iixhuihua Fares cati mocajque ipan altepet Jerusalén elque 468 tacame cati tetique para tatehuise.

⁷ Ten iixhuihua Benjamín mocajque ipan Jerusalén:

Salú, icone Mesulam, cati elqui icone Joed, cati icone Pedaías, cati icone Colaías, cati icone Maasías, cati icone Itiel, cati elqui icone Jesaías. ⁸ Huan ica Salú mocajque Gabai huan Salai huan sequinoc cati para nochí mochijque 928. ⁹ Huan inintayacanca ipan nopa altepet elqui Joel, icone Zicri, huan iniompa tayacanca elqui Judá, icone Senúa.

¹⁰ Ten nopa totajtzitzi mocajque ipan Jerusalén:
 Jedaías, icone Joiarib, Jaquín, ¹¹ huan Seraías, icone Hilcías, cati elqui icone Mesulam, cati icone Sadoc, cati icone Meraiot, cati icone Ahitob, cati elqui se tayacanquet ipan itiopa Toteco Dios. ¹² Huan inijuanti inihuaya cati tequitiyayaj ipan tiopamit eliyayaj 822. Nojquiya hualajqui para mocahuas Adaías, icone Jeroham, cati elqui icone Pelalías, cati icone Amsi, cati icone Zacarías, cati icone Pasur, cati

icone Malquías, ¹³ huan inihuaya nochiteixmatcahua cati tayacanani ten ininchaj ehuani mochihuayabaj 242. Nojquiya hualajqui para mocahuas Amasai, icono Azareel, cati elqui icono Azai, cati icono Mesilemot, cati elqui icono Imer. ¹⁴ Huan ihuaya hualajque 128 ihuampoyohua cati quinyacanayabaj ininchaj ehuani huan eliyabaj tacame cati tahuel tetique. Huan quinyacanayaya Zabdiel, icono Gedolim.

¹⁵ Ten nopa levitame mocajque ipan Jerusalén: Semaías, icono Hasub, cati elqui icono Azricam, cati icono Hasabías, cati elqui icone Buni. ¹⁶ Huan mocajque Sabetai huan Jozabad cati eliyabaj tayacanca levitame, cati quintequimacatoyaj para quiyacanase nochitequit calteno ipan itiopa Toteco Dios. ¹⁷ Huan mocajqui ipan Jerusalén Matanías, icono Micaía, cati elqui icone Zabdi, cati icono Asaf. Yaya cati motatajtiyaya quema quipehualtiyabaj sesen culto para quitascamatise Toteco Dios. Nojquiya mocajqui Bacbuquías cati nopa ompa para tayacanas huan teipa Abda, icono Samúa, cati elqui icone Galal, cati elqui icone Jedutún. ¹⁸ Huajca nochí ni levitame cati mocajque ipan altepet Jerusalén mochijque 284.

¹⁹ Ten nopa caltemit tamocuitahuiani mocajque ipan Jerusalén:

Acub, Talmón huan iniicnihua cati nojquiya quimocuitahuiyabaj caltemit. Huan para nochí mochijque 172.

Nopa masehualme cati itztoyaj ipan sequinoc altepeme

²⁰ Huan nopa sequinoc israelitame, totajtzitzi huan levitame mochantijque ipan sequinoc altepeme ipan tali Judá campa quiselijtoyaj tali ten inihuejcapan tatahua. ²¹ Pero nopa tacame cati tequipanohuayayaj tiopan calijtic mochantijque ipan nopa tepet Ofel nechca Jerusalén. Inintaya-cancahua eliyayaj Ziha huan Gispa.

²² Huan nopa tayacanquet ten levitame cati itztoyaj ipan Jerusalén eliyaya Uzi cati elqui iconē Bani, cati elqui iconē Hasabías, cati iconē Matanías, cati iconē Micaía, cati elqui se iixhui Asaf. Huan noch iixhuihua Asaf eliyayaj huicani ipan tiopamit. ²³ Huan nopa huicani mocajque imaco tanahuatili cati hualajqui ten nopa tanahuatijquet ipan tali Persia. Huan nopa tanahuatijquet quinnahuatiyaya taya quichihuase mojmosta.

²⁴ Huan Petaías, iconē Mesezabeel, cati elqui se ten iixhuihua Zera, cati elqui iconē Judá, yaya elqui itequipanoja nopa tanahuatijquet para quiitas noch tamanti ica israelitame.

Nopa masehualme cati itztoyaj ipan sequinoc pilaltepetzitzí

²⁵ Huan sequij iixhuihua Judá mocajque para itztose ipan altepeme Quiriat Arba, Dibón huan ipilaltepehua, Jecabseel huan ipilaltepehua, ²⁶ Jesúa, Molada, Bet Pelet, ²⁷ Hazar Sual, Beerseba huan ipilaltepehua, ²⁸ Siclag, Mecona huan ipilaltepehua, ²⁹ Enrimón, Zora, Jarmut, ³⁰ Zanoa, Adulam huan ininpilaltepehua, Laquis

huan imilhua huan Azeca huan ipilaltepehua. Huajca iixhuihua Judá mochantijtoyaj ten altepet Beerseba hasta nopa tamayamit cati itoca Hinom.

³¹ Huan inijuanti cati itztoyaj ipan nopa hueyi familia ten iixhuihua Benjamín mochantijque ipan altepeme: Geba, Micmas, Aía, Betel huan ipilaltepehua, ³² Anatot, Nob, Ananías, ³³ Hazor, Ramá, Gitaim, ³⁴ Hadid, Seboim, Nebalat, ³⁵ Lod, Ono huan ipan nochí nopa tamayamit campa itztoyaj nopa tacame cati quipiyayabaj miyac yajatili para quichihuase miyac tamanti.

³⁶ Huan quintitanque sequij levitame cati itztoyaj ipan tali Judá para ma itztotij ipan inintal iixhuihua Benjamín.

12

Totajtzitzi huan levitame cati tacuepilijque ihuaya Zorobabel

¹ Ya ni techilhuía catijqui totajtzitzi huan levitame tacuepilijque ihuaya Zorobabel, iconé Salatiel, huan ihuaya Jesúa. Inintoca nopa totajtzitzi elque:

- Seraías, Jeremías, Esdras,
- ² Amarías, Maluc, Hatús,
- ³ Secanías, Rehum, Meremot,
- ⁴ Iddo, Gineto, Abías,
- ⁵ Mijamín, Maadías, Bilga,
- ⁶ Semaías, Joiarib, Jedaías,
- ⁷ Salú, Amoc, Hilcías huan Jedaías.

Nochi ya ni eliyayaj tayacanani ten totajtzitzi huan inintapalehuijcahua ipan nopa tonali quemá tequitiyaya Jesúa.

⁸ Huan nopa levitame cati tacuepilijque inihuaya elque: Jesúa, Binúi, Cadmiel, Serebías, Judá huan Matanías cati ica ihuampoyohua tayacanayayaj ipan huicat para quitascamatise TOTECO ipan tasentili. ⁹ Nojquiya iniicnihua Bacbuquías huan Uni moquetzayayaj iniixmelac huan tapalehuiyayaj ipan tasentili.

¹⁰ Nopa hueyi totajtzi Jesúa quipixqui itelpoca cati itoca Joiacim.

Joiacim elqui itata Eliasib.

Eliasib teipa elqui itata Joiada.

¹¹ Joiada teipa elqui itata Jonatán.

Jonatán teipa elqui itata Jadúa.

Totajtitzitzi quema Joiacim elqui hueyi totajtzi.

¹² Nica eltoc inintoca nopa tayacanca totajtitzitzi cati quinyacanayayaj inihueyi familia ten totajtitzitzi huan tequitique imaco Joiacim quema yaya eliyaya hueyi totajtzi:

Meraías quinyacanayaya ichaj ehuani Seraías.

Hananías quinyacanayaya ichaj ehuani Jeremías.

¹³ Mesulam quinyacanayaya ichaj ehuani Esdras.

Johanán quinyacanayaya ichaj ehuani Amarías.

¹⁴ Jonatán quinyacanayaya ichaj ehuani Melicú.

José quinyacanayaya ichaj ehuani Sebanías.

¹⁵ Adna quinyacanayaya ichaj ehuani Harim.

Helcai quinyacanayaya ichaj ehuani Meraiot.

¹⁶ Zacarías quinyacanayaya ichaj ehuani Iddo.

Mesulam quinyacanayaya ichaj ehuani Ginetón.

¹⁷ Zicri quinyacanayaya ichaj ehuani Abías.

Piltai quinyacanayaya ichaj ehuani Miniamín huan Moadías.

¹⁸ Samúa quinyacanayaya ichaj ehuani Bilga.

Jonatán quinyacanayaya ichaj ehuani Semaías.

¹⁹ Matenai quinyacanayaya ichaj ehuani Joiarib.

Uzi quinyacanayaya ichaj ehuani Jedaías.

²⁰ Calai quinyacanayaya ichaj ehuani Salai.

Eber quinyacanayaya ichaj ehuani Amoc.

²¹ Hasabías quinyacanayaya ichaj ehuani Hilcías
huan Natanael quinyacanayaya ichaj ehuani
Jedaías.

²² Quema Darío tanahuatiyaya ipan tali Persia
quichijque se lista ica intoca nopa tayacanani
ten familias ten levitame huan totajtzitzí. Quichi-
jque ipan nopa tonali quema Eliasib, Joiada, Joha-
nán huan Jadúa eliyayaj huejhueyi totajtzitzí.
²³ Huan nopa tayacanca levitame quiijcuilojque
intoca ipan se amatapohuali hasta ipan nopa
tonali quema itztoya hueyi totajtzi Johanán, icone
Eliasib.

²⁴ Huan nopa levitame cati tayacanani elque:
Hasabías, Serebías huan Jesúa, icone Cadmiel.
Huan iniicnihua cati san se ininchaj ehuani mo-
quetzayayaj iniixmelac ipan nopa tasentili para
quipaqulismacase huan quitascamatise Toteco
Dios quema quintocarohua tequitise. Quej nopa
tapalehuiyayaj quej huejcajquiya tanahuatijtoya
David cati elqui itequipanojca Toteco Dios.

²⁵ Huan Matanías, Bacbuquías, Obadías, Mesu-
lam, Talmón huan Acub eliyayaj caltemit ta-
mocuitahuiani. ²⁶ Inijuanti tequipanojque quema
Joiacim, icone Jesúa huan iixhui Josadac, eliyaya
hueyi totajtzi, huan na niNehemías nieliyaya
gobernador, huan Esdras eliyaya totajtzi huan
tamachtijquet.

*Ilhuichijque pampa ya quisencajque nopa
tepamit*

²⁷ Quema ajsic tonali para quiyyocatalise para TOTECO nopa yancuic tepamit para altepet Jerusalén cati ya quitamicualchijchijtoyaj, huajca quintemojque nochí levitame ipan campa hueli altepeme huan quinhualicaque hasta altepet Jerusalén para tapalehuise ipan nopa ilhuit. Quinejque ma quihueyichihuaca TOTECO ica paquilsti, huan ica huicat para quitascamatise, huan ica tatzotzonali ica panderos, arpas huan liras. ²⁸ Huan nojquiya hualajque nopa levita huicani cati itztoyaj ipan pilaltepetzitzí nechca Jerusalén huan ipan nopa altepeme ten nopa netofatitame. ²⁹ Huan nojquiya hualajque huicani ten Gilgal, ten nopa mili nechca Geba huan ten Azmavet pampa nochí cati huicani mochantijtoyaj yahualtic altepet Jerusalén. ³⁰ Achtohui nochí nopa totajtzitzí huan levitame motapajpacchijque. Huan nojquiya quintapajpacchijque nochí israelitame, huan nopa caltemit ten nopa altepet huan nopa tepamit.

³¹ Teipa niquinnaahuati tequichihuani ipan tali Judá ma tejcoca iixco nopa tepamit. Huan niqintali ome pamit ten huicani. Nopa achtohui pamit nejnenque ica inejmat itzonixco nopa tepamit hasta nopa Tasoli Caltemit. ³² Huan Osaías quintoquili ica tajco nopa tequichihuani ten tali Judá, ³³ inihuaya Azarías, Esdras, Mesulam, ³⁴ Judá, Benjamín, Semaías huan Jeremías. ³⁵ Huan quintoquilijque sequij totajtzitzí cati

quipitzayabaj tapitzali. Teipa yajqui Zacarías, icone Jonatán, cati elqui icone Semaías, cati elqui icone Matanías, cati elqui icone Micaías, cati elqui icone Zetur, cati elqui icone Asaf.

³⁶ Huan ininacasta yajque Zacarías iicnihua, Semaías, Azarael, Milalai, Gilalai, Maai, Natanael, Judá huan Hanani cati tatzotzonayabaj ica itatzotzonahu David cati huejcajquia eliyaya itequipanojca Toteco Dios. Huan nopa tamachti-jquet Esdras quinyacanayaya.

³⁷ Huan quema ajsitoj campa nopa Ameli Caltemit quisehuiquili-jque nejnenque huan tejcoque ipan nopa ojti ten escalones cati yahui hasta campa itoca Ialtepe David. Teipa tejcoque campa ixtejco nopa tepamit huan panoque ica huejcapa ichaj David hasta nopa At Caltemit ica campa hualquisa tonati.

³⁸ Huan nopa seyoc pamit ten huicaní nejnenque ica iarravesco, huan na niNehemías, niyahuiyaya iniica, iixco nopa tepamit ica ne seyoc tajco masehualme. Huan tijpanoque nopa tetzocti cati itoca Horno Torre, huan hasta campa más patahuac nopa tepamit.

³⁹ Huan tijpanoque iixco nopa Efraín Caltemit, nopa Sosoltic Caltemit, nopa Michi Caltemit, nopa tetzocti cati itoca Torre ten Hananeel, huan nopa seyoc tetzocti cati itoca Torre ten Hamea. Teipa tipanoque hasta nopa Borrego Caltemit huan timoquetzatoj campa Tatzacti Caltemit.

⁴⁰ Huan teipa nochí ome pamit ten huicaní huan na huan tajco nopa tequichihuani tiyajque hasta itiopa Toteco Dios campa timoquetzatoj.

⁴¹ Tinejnemiyabaj inihuaya nopa totajtitzí cati tapitzayabaj cati inintoca: Eliacim, Maaseías,

Miniamín, Micaías, Elioenai, Zacarías huan Hananías, ⁴² huan nopa huicani cati huicayayaj chicahuac cati inintoca: Maasías, Semaías, Eleazar, Uzi, Johanán, Malquías, Elam huan Ezer. Huan Izrahías quinyacanayaya.

⁴³ Huan ipan nopa tonali quitatijque miyac tacajcahualisti para Toteco huan nochí paquiyayaj miyac pampa Toteco Dios quinmacatoya se hueyi paquilisti. Hasta nojquiya sihuame huan coneme tahuel paquiyayaj huan nopa tahuejchihualisti ten paquilisti ipan altepet Jerusalén quicaquiyayaj hasta huejca.

Nehemías quiyancuili nochí itequi nopa tiopamit

⁴⁴ Huan ipan nopa tonali quintalijque tacame para quimocuitahuise nopa cali campa quiajocuise nopa nemacti, nopa achtohui pixquisti huan nopa diezmos cati quihualicayayaj masehualme. Monequi quisentilise ten nochí milme ipan nochí altepeme cati itanahuatilhua Moisés quijito pampa ya nopa quintocarohua nopa totajtzitzihuan levitame. Huan nopa masehualme ten tali Judá paquiyayaj para temacase pampa nopa totajtzitzihuan levitame quintequipanohuayayaj.

⁴⁵ Huan nopa totajtzitzihuan levitame, inihuaya nopa huicani, huan caltemit tamocuitahuiani quihueyichijque Toteco Dios huan motapajpacchijque quej quijito nopa tanahuatilme cati David huan Salomón quinmacaque. ⁴⁶ Pampa hasta huejcajquiya quema itztoya David huan Asaf, itztoyaj tayacanani cati quinyacanayayaj huicani para quihueyichihuase huan quitascamatilise Toteco Dios.

⁴⁷ Huajca ipan ni tonali quema Zorobabel huan na, niNehemías, titayacanayaya, nochí israelitame quihualicayaya, nopa tacualisti cati mojmosta monequiyaya para nopa huicani huan nopa caltemit tamocuitahuiani huan nojquiya para nopa levitame. Huan nopa levitame teipa quiyocataliyaya se diezmo para iteipa ixhuihua Aarón, cati eliyaya totajtzitzi para ma quitequi-huica.

13

Nopa cuali tamanti cati pejque quichihuaj

¹ Huan ipan nopa tonal quema quipohuayaya miyacapa iniixpa nopa israelitame iamata pohual Moisés, quipantijque ijcuilijtoc ipan nopa amat para yon se amonita o moabita masehuali amo quema huelis mosentilis inihuaya imasehualhua Toteco Dios. ² Quej nopa elqui pampa amonitame huan moabitame amo quisque para quin-namiquiquij israelitame ica cati quicuase huan cati quiise huejcajquiya. Quinchihuilijtosquíaj israelitame cati cuali, pero amo ya nopa quichijque. Inijuanti quitaxtahuijque Balaam para ma quintelchihua israelitame. Pero Toteco Dios quicuetqui nopa tatelchihuali ica tatiochihuali. ³ Huajca quema quicajque ni tanahuatili quiniyo-ocaquixtijque nochí cati amo nelía israelitame.

⁴ Pero quema ayemo quicajquiya ni tanahuatili, nopa hueyi totajtzi Eliasib quipixqui imaco nochí cuartos huan tamanti cati quihualicayaya ipan itiopa Toteco Dios. Huan yaya moixmatiyaya ica Tobías. ⁵ Huan Eliasib quicualchijchihuilijtoya se hueyi cuarto ipan itiopa Toteco Dios

huan quicajqui imaco Tobías para quitequihuis quema quinequi. Nopa cuarto elqui campa achto-huiya quiajocuayayaj harina para tacajcahualisti, huan copali, huan nochí tebos tamantzitzí cati motequihuiyayaj ipan tiopamit. Nopona quicahuayayaj nopa diezmos ten trigo, xocomecat iayo huan aceite quej elqui tanahuatili para quinmacase nopa levitame, huicaní, caltemit tamocuitahuiani huan totajtzitzí. ⁶ Quema panoc nochí ya ni, amo niitztoya ipan altepet Jerusalén pampa quema Tanahuatijquet Artajerjes ipan tali Babilonia yahuiyaya para 32 xihuit tanahuatis, na nimocuetqui nopona ipan nopa caltanahuatili para nijtequipanos. Pero teipa nijtajtani ma nechcahua sempa nihualas ipan altepet Jerusalén, ⁷ huan yaya nechcajqui huan nihualajqui ipan altepet Jerusalén. Huan quema niajsico ipan Jerusalén huan nijmatqui para Eliasib quichijtoya cati fiero huan quimacatoya se cuarto Tobías ipan itiopa Toteco Dios, ⁸ huajca tahuel nicualanqui. Huan nijquixti nochí itamantzitzí Tobías ipan nopa cuarto. ⁹ Huan nitanahuati para ma quitapajpacchihuaca nopa cuarto huan sempa ma quitalica nopona nopa tebos tamantzitzí cati motequihuiyaj ipan itiopa Toteco Dios, huan nopa harina para tacajcahualisti huan nopa copali.

¹⁰ Nojquiya niquitac para ayecmo quinmacatoyaj inintacualis levitame huan huicaní quej quinamiquiyaya. Yeca nochí injuanti mocuectoyaj ipan sesen inialtepehua para tequitise ipan inimil. ¹¹ Huajca niquinajhuac nopa tequichihuani huan niquinilhui: “¿Para ten anquitahuelcajtoque itiopa Toteco Dios?”

Teipa niquinsentili nochí nopa levitame huan huicani, huan sempa niqvintali campa quintocarohua para tequipanose. ¹² Huajca nochí israelitame ipan tali Judá sempa pejque quihualicaj inindiezmos ten trigo, ten xocomecat iayo huan ten aceite para quiajocuise. ¹³ Huan nijtequimacac nopa totajtzi Selemías, huan nopa tamachtijquet Sadoc, huan nopa levita Pedaiás para inijuanti ma quimocuitahuica nopa cuartos campa quiajocuij nochí tamanti. Huan nojquiya nijtequitali Hanán, icone Zácur huan iixhui Matanías, para quinpalehuis. Nochi niquinitac para tacame cati temachme. Huan inintequi elqui para quinmajmacase tacualisti inilevita icnihua. Huan nimotatajti: ¹⁴ “NoTeco Dios, xiquelnamiqui ni tamanti cati cuali cati nijchijtoc, huan amo xiquelcahua nopa sequinoc tamanti cati nijchijtoc para motiopa huan nochí tequit cati mochijtoc nopona.”

Quiixpanoche nopa tonali sábado

¹⁵ Ipan nopa tonali nojquiya niquitac para miyaqui masehualme ipan tali Judá tequitiyayaj ipan sábado. Quixacualohuayayaj xocomecat para quiqxintise iayo, huan quihualicayayaj tamamali ten trigo huan quinmamaltiyayaj ininburrojhua. Nojquiya ipan sábado quihualicayayaj xocomecat iayo, xocomecat, higos huan nochí cati quipixque ipan altepet Jerusalén para quinamacaqueij. Huajca niquinajhuac pampa tanamacayayaj ipan sábado. ¹⁶ Huan nojquiya itztoyaj sequij tacame ten altepet Tiro cati quinhualicayayaj michime huan miyac tamantzitzí para quintanamaquiltise

israelitame ipan sábado. ¹⁷ Huajca niquinajhuac nopa tequichihuani ten tali Judá huan niquinilhui:

—Tahuel fiero cati anquichihuaj pampa anquixpanoj ni tonali para timosiyajquetzase. ¹⁸ ¿Amo anquimatiј para quej nopa quichijque tohuejcapán tatahua huan yeca Toteco Dios quihualicatoc nochí ni taijyohuilisti ipan tojuanti huan toaltepe? Huan ama achi más anquihueyilíaj icualancayo Toteco Dios para tiisraelitame pampa hueyi anquixpanoj ni tonali sábado.

¹⁹ Huajca na nitanahuati para sesen viernes ica tiotac quema pehuayaya nopa tonali para timosiyajquetzase, ma quitzacuaca nopa huejhueyi caltemit ipan nopa tepamit ten toaltepe. Huan niquinilhui ma amo quitapoca hasta quema panotosa sábado. Huan nojquiya niquintali notequipanojcahua para ma tamocuitahuica huan amo aqui ma quicahuilica calaquis ipan sábado ica itamamal para quinamacas. ²⁰ Huajca se ome huelta nopa tanamacani monejqui tonilise calteno ten itepa altepet Jerusalén. ²¹ Huan na niquinajhuac chicahuac huan niquinilhui: “¿Para ten anmochijtoque nechca itepa ni altepet? Sinta sempa anquichihuase, nimechtzacuas.” Huajca ayecmo quema hualajque ipan sábado. ²² Teipa niquinnahuati cati levitame ma motapajpacchihuaca huan ma tamocuitahuica ipan caltemit para amo aqui ma quiixpano nopa sábado para mocahuas tatzejzeloltic nopa tonali para Toteco Dios. Huan nimotatajti: “NoTeco Dios, xiquelnamiqui nojquiya ni cati nijchijtoc. Techtasojta ica mohueyi taicnelil.”

23 Ipan nopa tonali nojquiya niquitac para miyaqui israelitame motahuicaltijtoyaj inihuaya sihuame cati amo israelitame cati hualajque ten talme Asdod, Amón huan Moab.

24 Huan quej tajco ininconehua camanaltiyayaj inincamanal masehualme ten Asdod huan amo huelyayaj camanaltij tocamanal titali Judá ehuani. **25** Huajca niquinixnamijqui huan niquintelchijqui. Huan sequij niquinmaquili huan niquintzoncalhuihuitac. Huan

niquinchijqui ma quitestigoquetzaca Toteco Dios para ayecmo motahuicaltise inihuaya, yon ayecmo temacase iniichpocahua para ma monamictica inihuaya cati amo israelitame.

26 Huan nojquiya niquinilhui: “Ya ni nopa tajtacoli cati quichijqui Tanahuatijquet Salomón ten tali Israel. Amo oncayaya seyoc tanahuatijquet quej ya ipan seyoc tali. Huan Toteco Dios tahuel quiicneli huan quichijqui tanahuatijquet ipan nochí tali Israel, pero yaya huetzqui ipan tajtacoli por nopa sihuame cati mocuili cati sequinoc tali ehuani. **27** Amo timechcahuilise anquichihuase ni hueyi tajtacoli huan anquiixpanose Toteco Dios. Amo hueli anmocuilise cati amo israelitame.” Quej nopa niquinilhui.

28 Huan se icone Joiada cati elqui icone nopa hueyi totajtzi Eliasib mosihuajtijtoya ica iichpoca Sanbalat huan mochijqui imontica Sanbalat nopa horonita tacat. Huajca nijquixti para amo quema huelis technechcahuis sempa. Huan nimotatajti: **29** “NoTeco Dios, xiquinelnamiqui nopa totajtitziti huan levitame cati tajtacolchijtoque huan

quimahuispolojoque inintequi.”

³⁰ Huan quej nopa niquinquixti nochí catí amo israelitame. Huan niquintequivimacac totajtzitzí huan levitame sesen ten inijuanti campa quintocarohua. ³¹ Huan nojquiya njmocuitahui nochipa para nochí tacame quihualicase cuahuit para taixpamit quema quintocarosquía. Huan njmocuitahui para quihualicase iachtohui tajca inimilhua. Huan nimotatajti: “Techelnamiqui ica cuali, NoTeco Dios.”

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

lix

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e